

Sɛwɛ konɔɓanɗa ɗa
ZHAN
wɪla yɔnlɔɔ ma torogo
Sɛwɛ wi nawa sɛnrɛ

Ki sɛwɛ ɗa Zhan wo wɪla wi yɔnlɔɔ maa torogo. Zhan wɪla pye Zebede pinambyɔ (Maki 1.19-20). Wɪla pye Zhezu wi pitunɗɔ. Wo wɪ Zhezu Sentanra nda Zhan mɛgɛ ki yɛn ti na ti yɔnlɔɔ konaa Nagawa sɛwɛ wi ni. Wɪla pye faa ɗɔɓanra wɔfɔ; a Zhezu wɪ si kaa wi yeri maa pye wi fɔrɔɔfɔ. Zhan wɪla pye leele mbele paa pye Zhezu wi tanla toon wo wa, ma pinlɛ Zhaki naa Pyeri pe ni.

Leele pe yɛn naga yuun ma yo fɔ Zhezu wi pitunɗɔ Zhan wɪla saa cɛn wa Efezi ca. Pɔli wɪla legiliziye pele nɔɔgɔ lɛ wa ki ca ki ni. Naa Zhan wɪla ka saa gbɔn wa ki ni, a wɪ si pye ki legiliziye pe yɛkelewe.

Sɛwɛlɛ taanri Zhan wɪ yɔnlɔɔ ma torogo. Wi sila sɛwɛ konɔɓanɗa wi yɔnlɔɔ mboɔ torogo legilizi nunɔɓa kan nakoma lere nunɔɓa kan. Eɛn fɔ wɪla wi yɔnlɔɔ, jango paa wi kara legiliziye pe ni fuun pe ni.

Ki Zhan sɛwɛ konɔɓanɗa ɗa, sɛnrɛ yinɛ shyen ti yɛn wa wi ni. Wa sɛnrɛ go konɔɓanɗa ki ni, Zhan wi yɛn naga yɛnri tagafenne pe yeri ma yo paa tanri wa kozinne li ni. Ko kɔrɔ wo yɛn fɔ pe daga mbe taga we Fɔ Zhezu Kirisi wi na konaa pe pe yɛɛ ndanla.

Wa sɛnrɛ go shyɛn wogo ki ni, Zhan wi yɛn naga yuun tagafɛnnɛ pɛ kan ma yo pɛ pɛ yɛɛ yingiwɛ jɛn nagafɛnnɛ yagboyoolo pɛ ni (2.18-29; 4.1-6).

Sɛwɛ wi yɛn ma kɔɔnɔ yɛgɛ nɔa na

Sɛnrɛ ti lɛsaga: Yinwege kigi yɛɛ naga wa Zhezɔ wi ni *1.1-4*

Yanwa naa wɔwɔ sɛnrɛ *1.5-2.29*

Tagafɔ wi yinwege ki daga mbe pye kpoyi, wi koro wi mara Yɛnɛlɛ li na *3.1-24*

Kaselege naa punɔguwɔ kala *4.1-6*

Ndanlawa pi tunɔgo *4.7-21*

Tagawa mba pi yɛn cew tawa ni *5.1-21*

Yinwege sɛnrɛ

¹ We yɛn naga sɛwɛ nɔa wi torogi ye kan, yinwege Sɛnrɛ† to kanɔgɔlɔ. Ti yɛn wa maga lɛ dunrɔya wi dasanga wi ni. Wɛri logo, mari yan we yɛngɛlɛ jate ke ni, mari wele, a we keyɛn yì jiri ti na.

² Naa ki yinwege kila ki yɛɛ naga, wàa ki yan. Ko kì ti we yɛn naga sɛnrɛ yuun. Yinwege mbakɔgɔ nɔa kila pye wa we To wi tanla ma kaa ki yɛɛ naga, ko sɛrɛya wo waa yuun na ye kaan.

³ Nɔa wè yan ma logo, ko we yɛn na yari ye kan fun, jango ye gbogolo nunɔgba we ni, ye ye wa gbogolomɔ mba wè ta we To wo naa wi Pinambyɔ Zhezɔ Kiri si pɛ yeri pi ni.

⁴ We yɛn naga wogo nɔa ki yɔnɔgi mbege torogo ye kan, jango we nayinmɛ pi yɛɛ yɔn fili.

Yɛnɛlɛ li yɛn yanwa

† **1:1 1.1:** *Yinwege sɛnrɛ:* To ti yɛn Zhezɔ Kiri si we.

⁵ Senre nda wè logo Zhezu Kirisi wi yeri nari yari ye kan, tori nda yen fò: Yenñele li yen yanwa, wòwò kpe woro wa li ni.

⁶ Na waga yo we yen ma gbogolo nunḡba Yenñele li ni, mbe sigi ta we yen na tanri wa wòwò pi ni, kona we yen na finñele, we woro na tanri kaselege ki na.

⁷ Eñ fò, na we kaa tanri wa yanwa pi ni paa yege nga na Yenñele lo jate li yen wa yanwa pi ni, kona, we ni fuun nunḡba nunḡba we yen gbogolomò nunḡba ni we yee ni. A li Pinambyò Zhezu wi kasanwa pila we piin kpoyi na we lari kapege ki ni fuun ki na.

⁸ Na waga yo kapege woro we na, kona, we yen na we yee fanla, kaselege woro wa we nawa.

⁹ Eñ fò, na waga we kapere ti yo mbe Yenñele li kan, pa we mbe ya we jigi wi taga li na, katugu li yen senre nunḡba yofò ma sin, pa li yaa we kapere ti kala yaga we na, mbe we pye kpoyi mbe we laga kambasinḡge ki ni fuun ki na.

¹⁰ Na waga yo wee kapege pye, we yen na Yenñele li piin yagboyoo, li senre ti woro wa we nawa.

2

Kirisi wi yen we sagafò

¹ Na piile, mi yen naga kagala ngele ke yonlogi mbe ke torogo ye kan, jango yaga ka kapege pye. Eñ fò, na wa ka si kapege pye, sagafò yen we yeri wa we To Yenñele li tanla, wo wi yen Zhezu Kirisi na wi yen ma sin we.

² Katugu wùu yee wò saraga ma kapere ti fògò ton, kii pye woro kapere to nunḡba kala na, kì

pye dunruya woolo pe ni fuun pe woro ti kala na.

³ Na we ka Yenɲele li ɲgasegele ke yigi mbaa tanri ke na, ko we maga ɲen ma yo we yen mali ɲen.

⁴ Na ɲa ka yo wi yen mali ɲen, mbe sigi ta wi sili ɲgasegele ke yigi mbaa tanri ke na, wo yen yagboyoo, kaselege woro wa wi nawa.

⁵ Eɛn fɔ, lere ɲa ka Yenɲele sɛnrɛ ti yigi, Yenɲele li maa ndanla ma yɔn fili kaselege na. We mbe ya mbege ɲen mbe yo we yen nunɲba Yenɲele li ni yege ɲga na koyi ɲga yeɛn.

⁶ Lere ɲa ka yo wi yen Yenɲele li ni, wi daga mbaa tanri paa yege ɲga na Zhezu wila tanga we.

Ngasele fɔnnɔ

⁷ Na wɛnnɛ, ɲgasele fɔnnɔ ma mila yɔnɔgi mbe torogo ye kan, eɛn fɔ, ɲgasele lɛlɛ li. Li yen wa ye yeri maga lɛ sanga ɲa ni yɛ taga. Ki ɲgasele lɛlɛ lo li yen sɛnrɛ nda yɛ logo mako we.

⁸ Konaa ki ni fuun, ɲgasele fɔnnɔ li mi yen na yɔnɔgi mbe torogo ye kan. Li kaselege ki ma ki yeɛ naga wa Kirisi wi ni konaa wa ye ni fun. Ki kala na, wɔwɔ pila kee, yanwa jɛmbɛ pila yiin mako.

⁹ Lere ɲa ka yo wi yen na tanri wa yanwa pi ni, mbe sigi ta wi yen maa lewee yenlɛ wa panra, wi yen wa wɔwɔ pi ni bere.

¹⁰ ɲa wi lewee yenlɛ wi yen maa ndanla, wo yen wa yanwa pi ni. Kiga pye ma, kala lo la na pye wa wi nawa, na li mbe lere wa kan wi to wa kapege ki ni.

11 Ɛɛn fɔ, ɲa ka wi lewee yenle wi panra, wo yen wa wɔwɔ pi ni, wi yen na tanri wa wɔwɔ pi ni. Wi suu yeɛ karisaga ki jɛn, katugu wɔwɔ pi ma ti wila la yaan.

12 Na piile, mi yen naga sɛwe ɲa wi torogi ye kan, katugu Yenɲele li ye kapere ti kala yaga ye na Zhezu wi meɛɛ† ki na.

13 Na teele, mi yen naga sɛwe ɲa wi torogi ye kan, katugu Yenɲele na li yen wa maga le wa ki lesaga ki na, ye yen mali jɛn. Lefɔnmbɔɔ mi yen naga sɛwe ɲa wi torogi ye kan, katugu ye ya Sotanla wi ni.

14 Na piile, mi yen naga sɛwe ɲa wi torogi ye kan, katugu ye yen ma we To Yenɲele li jɛn. Na teele, mi yen naga sɛwe ɲa wi torogi ye kan, katugu ɲa wi yen wa maga le wa ki lesaga ki na, ye yen maa jɛn. Lefɔnmbɔɔ, mi yen naga sɛwe ɲa wi torogi ye kan, katugu fanɲga yen ye ni. A Yenɲele li senre ti koro ye ni, a ye ya Sotanla wi ni.

15 Yaga ka ti dunruya† wi ye ndanla, wi nawa yaara ti ye ndanla. Na dunruya wi ka lere ɲa ndanla, we To Yenɲele laa ki fɔ wi ndanla;

16 katugu yaraga ɲga fuun ki yen dunruya wi wogo, wire ti jogo kagala, naa yaraga ɲga lere wi ma yan na jaa, naa yeɛ gbɔgɔwɔ dunruya yaara

† **2:12 2.12:** Yenɲele li we kapere ti kala yaga we na Zhezu wi meɛɛ ki na, ko kɔrɔ wo yen ɲga Zhezu wi pye ki kala na. † **2:15 2.15:** Senweele pe dunruya wo ma, ɛɛn fɔ, kapege dunruya ɲa Sotanla wi yen na yege sinni na wiin Yenɲele li ni wowi. Dunruya wi nawa yaara nda senre ti yen na yuun, to ti yen yaara nda ti yen kapege woro.

taga ki kala na, tila la yinrigi wa we To Yenηεε lo yeri, ti maa yinrigi dunruya wo yeri.

¹⁷ Dunruya wila koo na kee, naa yaara nda leele pe yen na yaan na jaa ti ni fuun ti ni. Eεn fɔ, ηa kaa Yenηεε li nandanwa kala li piin, wo yaa koro yinwege na fɔ sanga pyew.

Kirisi wi winfɔ we

¹⁸ Na piile, dunruya koyεεε ki yɔngɔ. Yεge logo ma yo Kirisi wi winfɔ wi daga mbe pan. Ma si yala, Kirisi wi winfenne pe lεgereε pan yingɔ, pa wεge jεn yεεn ma yo dunruya koyεεε ki yɔngɔ.

¹⁹ Ki leele pe sila pye we woolo kaselege na, ko kɪ ti pε laga we na ma kari. Nδεε paa pye we woolo, pe jεn na koro laga we ni. Eεn fɔ, pε laga we na ma kari, a kɪ ta ma filige fɔ pe ni wa kpε sila pye we woo.

²⁰ Yoro wo na, yε Yinnekpoyi na Kirisi wi tirige ye na li ta. Kɪ pye ma, ye ni fuun yε kaselege ki jεn.

²¹ Ki sεwe ηa mɪ torogo ye kan yεεn, ki woro mbe yo yee kaselege ki jεn, εεn fɔ, katugu ye yen maga jεn. Ye si yen maga jεn fun ma yo yagbolo kpε se ya yiri wa kaselege ki ni.

²² Ambɔ wi yen yagboyoo wo? Wo wi yen lere ηa wi ma yo Zhezu wo ma wi yen Kirisi we. Ko lerefɔ wo wi yen Kirisi wi winfɔ we, wi ma je Yenηεε na li yen To lo naa li Pinambyɔ pe na.

²³ Ki kala na, ηa ka je Pinambyɔ wi na, wi ma je Tofɔ wi na fun. ηa ka yenleε Pinambyɔ wi na, Tofɔ wi ma pye wi ni.

²⁴ Ki kala na, senreε nda yε logo maga le wa ki lesaga ki na, yeri yaga ti koro wa ye nawa. Nda

yàa logo maga ɛ wa ki ɛsaga ki na, na tiga koro wa ye nawa, pa yoro fun ye yaa koro mbe mara Pinambyɔ wo naa wi To pe na.

²⁵ Kirisi wì yɔn fɔlɔ li kɔn mbe yaraga ŋga kan we yeri, ko ki yɛn yinwege mbakɔɔ ye.

²⁶ Mbele pe yɛn naga jaa mbe ye fanla mbe ye punɔ, mi yɛn naga sɛwɛ ŋa wi yɔnlɔgi mboo torogo ye kan pe kala na.

²⁷ Yoro wo na, yè Yinnekpoyi li ta Kirisi wi yeri. Paa wi Yinnekpoyi li kaa pye ye ni, yee jori lere wa kala wila ye nari, katugu Yinnekpoyi li yɛn na ye nari kagala ke ni fuun ke ni, li nagawa sɛnrɛ ti si yɛn kaselege, yagbolo ma. Ki kala na, ye Yinnekpoyi li nagawa sɛnrɛ ti yigi ye koro ye pye nunɔgba Kirisi wi ni.

²⁸ Ki kala na, na piile, ye koro Kirisi wi ni, janɔ na wiga kaa yɛɛ naga sanga ŋa ni, we kotogo ta, waga ka fɛrɛ shɔ wa wi yɛɛ sɔɔwɔ wi panmbilige.

²⁹ Yège jɛn ma yo Kirisi wi yɛn ma sin, ki kala na, ye daga mbege jɛn fɔ lere o lere wi maa kasinɔge ki piin, wo yɛn Yɛnɛle pyɔ.

3

Yɛnɛle li piile pe kala

¹ Yege wele paa yɛɛ ŋga na we yɛn ma we To Yɛnɛle li ndanla we, li ndanlawa pì gbɔɔ jɛnɛ, fɔ a paa we yinri Yɛnɛle piile. Pa we si yɛn ma kaselege. Ko kì ti dunruya woolo pee we jɛn, katugu pee Yɛnɛle li jɛn.

² Na wennɛ, yinɔ we yɛn Yɛnɛle li piile, ɛɛn fɔ, we yaa ka pye yɛɛ ŋga na, ko fa naga mbe

filige gben. Wège jɛn ma yo na Kirisi wiga kaa yɛɛ naga, we yaa ka pye paa wi yɛn, katugu we yaa kaa yan paa yɛgɛ nɔa na wi yɛn we.

³ Ko jigi wo yɛn lere nɔa fuun yeri, a wùu taga Kirisi wi na, wi maa yɛɛ pye kpoyi paa yɛgɛ nɔa na Zhezu Kirisi wi yɛn kpoyi we.

⁴ Lere nɔa fuun wi maa kapege ki piin, wi maa Yɛnɔelɛ li lasiri wi jogo. Kapege ko ki si yɛn Yɛnɔelɛ li lasiri wi jɔgɔwɔ we.

⁵ Ye si yɛn maga jɛn ma yo Kirisi wì pan maa yɛɛ naga mbe leele pe kapere ti laga pe na, kapege kpe woro wo na.

⁶ Ki kala na, lere nɔa fuun ka koro mbe mara wi na, wo na la kapege piin fyew. Eɛn fɔ, lere nɔa fuun wi koro na kapege ki piin, wo fa Zhezu wi yan, wi fa suu jɛn.

⁷ Na piile, yaga ka ti lere wa mbe ye fanla wi ye punɔo. Nɔa wi ma koro na kasinɔge ki piin, wo yɛn ma sin paa yɛgɛ nɔa na Zhezu Kirisi wi yɛn ma sin we.

⁸ Nɔa wi ma koro na kapege ki piin, wo yɛn Sɔtanla woo, katugu Sɔtanla wila kapege ki piin maga lɛ wa fafafa. Yɛnɔelɛ li Pinambyɔ wì pan maa yɛɛ naga, janɔo mbe Sɔtanla wi kapyere ti jɔgɔ.

⁹ Lere nɔa fuun wi yɛn Yɛnɔelɛ li pyɔ, wo na koro mbaa kapege ki piin, katugu Yɛnɔelɛ li maa yinwege nɔa kaan ki yawa pi yɛn wi ni. Paa Yɛnɔelɛ li yɛn wi To, ki kala na, wi se ya koro mbaa kapege ki piin.

¹⁰ Yɛnɔelɛ li piile poro naa Sɔtanla wi piile pe ni, pe ma pe jɛn ma pe wɔ pe yɛɛ ni yɛgɛ nɔa

na ki nga: Lere ɲa fuun wi woro na kasingge piin, nakoma ɲa wi sefo wi suu ndanla, wo woro Yenɲele pyo.

Yaa ye yee ndaan

¹¹ Senre nda ye logo maga le wa ki lesaga ki na, tori nda yeen fo: We we yee ndanla.

¹² Waga ka pye paa Kayen yen, wila pye Sotanla wo woo, a wuu jonlo lenaɲa wi gbo. Kila cen mele, a wi suu gbo? Katugu Kayen wi kapyere tila pye ma tijanga, ma si yala, wi jonlo wo kapyere to la pye ma sin.

¹³ Sefenne, na dunruya woolo paga ye panra, ko ka ka ye pari.

¹⁴ Wege jen ma yo we wo wa kunwo pi ni ma yinwege ta, we yen maga jen, katugu sefenne pe yen ma we ndanla. Lere ɲa wi sefo wi suu ndanla, wo koro wa kunwo pi ni bere.

¹⁵ Lere ɲa fuun wi maa lewee yenle wi panra, wo yen legbolere. Ye si yen maga jen ma yo yinwege mbakogo ki woro legbolere wa kpe ni.

¹⁶ We yen ma ndanlawa pi koro wi jen yege nga na, ki nga fo: Kirisi wuu yinwege ki kan kunwo pi yeri we kala na. Woro fun we daga mbe we yee kan kunwo pi yeri we sefenne pe kala na.

¹⁷ Na lere wa ka dunruya ɲa wi yarijende ti ta, mbe suu lewee yenle wa yan wi jori, na wi yinriwe suu ta, pa Yenɲele li yaa pye mboo ndanla mele?

¹⁸ Na piile, leele pee daga mbe we ndanla senyoro to naa yon sentanra to ce ni. Ki daga ki pye ndanlawa kaselege woo, pila pi yee nari wa we kapyere ti ni.

Jigi ɲa wè ta Yennɛle li yege na

¹⁹ Pa we yaa ki jɛn yɛɛn mbe yo we yɛn kaselege fɛnnɛ, we jatere wi mbe ya cɛn we na Yennɛle li yege na.

²⁰ Na we jatere wi kaa we jɛrɛgi, Yennɛle li gbɔgɔ ma wɛ we jatere wi na, ma kala li ni fuun li jɛn.

²¹ Na wɛnnɛ, na we jatere wi woro na we jɛrɛgi, we ma kotogo ta Yennɛle li yege na.

²² Na waga yaraga o yaraga yɛnri li yeri, we yaa ki ta li yeri, katugu wòo ɲgasegele ke yigi na tanri ke na, naa nandanwa kagala ke piin.

²³ Wi ɲgasele loli na fɔ we taga li Pinambyɔ Zhezu Kirisi wi mɛge ki na, we we yɛɛ ndanla paa yege ɲga na Kirisi wìgi yo we kan ma yo waa ki piin we.

²⁴ Lere ɲa ka Yennɛle li ɲgasegele ke yigi mbaa tanri ke na, wo yɛn Yennɛle li ni, a Yennɛle fun li yɛn wi ni. We yɛn maga jɛn Yinnekpoyi na li kan we yeri lo fanɲga na.

4

*Yennɛle li Yinnekpoyi
lo naa Kirisi wi winfɔ wi yinnɛ le*

¹ Na wɛnnɛ, mbele fuun pe yɛn na pe yɛɛ piin ma yo Yinnekpoyi li yɛn pe ni, yaga ka taga pe ni fuun na. Ɛɛn fɔ, ye pe wa ye wele yege jɛn, na kaa pye yinnɛ na li yɛn pe ni li yiri Yennɛle yeri. Mì ko yo ma, katugu Yennɛle yɔn sɛnrɛ yofennɛ yagboyoolo pe lɛgɛrɛ pan laga dunruya wi ni.

² Ʋga ki yaa ti ye sigi jɛn ye yo fɔ Yennɛle li Yinne loli, koyi ɲga yɛɛn fɔ: Lere ɲa fuun kaga yo

mbe yo kaselege Zhezu Kirisi wì pan ma senwee wire ɛ, Yinnekpoyi na lì yiri wa Yenɲele li ni, li yen wi ni.

³ Ɛen fɔ, Lere ɲa fuun ka je mbe yo Zhezu wii pan mbe senwee wire ɛ, Yinnekpoyi na lì yiri wa Yenɲele li ni, li woro wi ni. Yinne na li yen wi ni, Kirisi wi winfɔ wi yinne loli. Yàa ki logo ma yo wi daga mbe pan. Yinɲɔ wì pan makɔ laga dunruya wi ni.

⁴ Ɛen fɔ, yoro wo na, na piile, ye yen Yenɲele li woolo. Yè fanɲga ta Yenɲele yon senre yofenne yagboyoolo pe na; katugu Yinnekpoyi na li yen ye ni, li yen yawa ni ma we yinne na li yen mbele pe yen dunruya woolo pe ni li na.

⁵ Poro wo na, pe yen dunruya wi woolo, ki kala na, kagala ɲgele ke yen ma dunruya woolo pe ndanla, koro pe maa yuun, a dunruya woolo paa nuru pe yeri.

⁶ Woro wo na, we yen Yenɲele li woolo. Lere ɲa wì Yenɲele li jen, wi maa nuru we yeri. Lere ɲa wi woro Yenɲele li woo, wo na la nuru we yeri. Pa we mbe ya kaselege Yinne li jen mbeli wɔ yinne na li maa leele punɲgu li ni yeen.

Yenɲele li yen ndanlawa

⁷ Na wennɛ, ye ti we we yee ndanla, katugu ndanlawa pì yiri Yenɲele lo yeri. Lere ɲa fuun leele yen maa ndanla, wo yen Yenɲele li pyɔ, wi yen ma Yenɲele li jen.

⁸ Lere ɲa leele woro maa ndanla, wii Yenɲele li jen, katugu Yenɲele li yen ndanlawa.

⁹ Yenɲele lili ndanlawa pi naga we na yeeɲ ɲga na ki ɲga: Lili Pinambyɔ nunɲba pe wi tun laga

dunruya wi ni, jango we yinwege ta wi fannga na.

¹⁰ Nga ki yen ndanlawa we, ki nga: Kii cen ndεε Yenηελε lo li woro ndanla, εεν fɔ, woro we lo ndanla, a li sili Pinambyɔ wi tun, jango wi pan wi pye we kapere ti fɔgɔ tɔnsaraga.

¹¹ Na wennε, na ki kaa pye we Yenηελε li ndanla ma, ki kala na, woro fun ki daga we we yeε ndanla.

¹² Lere kpε fa Yenηελε li yan yenle ni fyew. Na waga we yeε ndanla, pa Yenηελε li yaa koro we ni. Li ndanlawa mba pi yen we ni, pi yaa pi yeε yɔn fili.

¹³ Naa Yenηελε lili Yinnekpoyi li kan we yeri, ko ki ti wεge jen ma yo we yen Yenηελε li ni, a Yenηελε fun li yen we ni.

¹⁴ Woro jate wεge yan, we nεε ki yuun ma yo Yenηελε na li yen To lili Pinambyɔ wi tun wi pan wi pye dunruya woolo pe Shɔfɔ.

¹⁵ Na lere ηa kaga yo mbege filige mbe yo Zhezu wi yen Yenηελε li Pinambyɔ, Yenηελε li yen wi ni, a wo fun wi yen Yenηελε li ni.

¹⁶ Woro wo na, we Yenηελε li ndanla yege ηga na, wεge jen ma taga ki na. Yenηελε li yen ndanlawa. Lere ηa leele yen maa ndanla, wi yen Yenηελε li ni, a Yenηελε fun li yen wi ni.

¹⁷ Pa ndanlawa pi pi yeε yɔn fili wa we ni yeεn, jango we kotogo ta kiti konpilige, katugu we tangalɔmɔ laga ki dunruya ηa wi ni, pi yen ma yiri Zhezu Kiriwi wi woo pi kɔrɔgɔ.

¹⁸ Ndanlawa pila lere kan wila fyε. Ndanlawa mba pi yɔn fili, pi ma lere fyεre kɔ wi na. εεν

fɔ, fyere ti maa paan jolɔɔ ni. Na wi maa fyɛ wi ndanlawa pila pi yɛɛ yɔn fili.

¹⁹ Woro wo na, leele pe yen ma we ndanla, katugu woro we keli ma Yenɲele li ndanla gben.

²⁰ Na lere wa ka yo Yenɲele li yen maa ndanla mbe sigi ta wuu lewee yenle wi panra, wi yen yagboyoo; katugu lere na wi lewee yenle na wila yaan wi woro maa ndanla, Yenɲele na wi woro na yaan li mbe ya mboo ndanla meɛ?

²¹ Ngasele na Kirisi wi kan we yeri loli na fo: Yenɲele li yen ma lere na ndanla, ki daga wi lewee yenle wuu ndanla fun.

5

Wè fanɲga ta dunruya wi na

¹ Lere na fuun ka taga ki na mbe yo Zhezu wi yen Kirisi, wo yen Yenɲele li pyɔ. Tofɔ wi yen ma lere na fuun ndanla, wi piile pe maa ndanla fun.

² Pa wège jen yɛɛn ma yo Yenɲele li piile pe yen ma we ndanla: Na Yenɲele li ka we ndanla waa tanri li ngasegele ke na we.

³ Yenɲele li we ndanla, ko ki yen fo we yen na tanri li ngasegele ke na. Li ngasegele ke si woro ma ngban we yeri mbe toro,

⁴ katugu Yenɲele pyɔ pyew wi ma fanɲga ta dunruya wi na. Fanɲga nga wè ta dunruya wi na, ko ki yen we tagawa we.

⁵ Ambɔ wi mbe ya fanɲga ta dunruya wi na? Ndɛɛ na wi taga ki na ma yo Zhezu wi yen Yenɲele li Pinambyɔ wo ɛɛ.

*Sereya na Yenɲele li yo
Zhezu Kirisi wi kanngɔɔ*

⁶ Na wì pan tònmo† naa kasanwa pi fannga na, wo wi yen Zhezu Kirisi we. Wii pan tònmo po nungba fannga na, een fo, wì pan tònmo po naa kasanwa po fannga na. Yinnekpoyi lo li yen naga sereya wì yuun ma yo ki yen kaselege, katugu Yinnekpoyi li yen kaselege fo.

⁷ Ki pye ma, serefenne taanri pe yen wa.

⁸ Yinnekpoyi lo naa tònmo pi ni, naa kasanwa pi ni, pe taanri pe sereya wì fili nungba naga yuun ma yo Zhezu wi yen Yenñele li Pinambyo.

⁹ We ma yenle leele sereya wo na, ma si yala, Yenñele li sereya wì gbogo ma we pe woo wi na. Ko sereya wowi na Yenñele li yo li Pinambyo wi kanngolo.

¹⁰ Na ka taga Yenñele li Pinambyo wi na, ki sereya wi ma pye wa wi nawa. Een fo, lere na wii taga Yenñele li na, wi ma Yenñele li pye yagboyoo, katugu wii taga sereya na Yenñele li yo li Pinambyo wi kanngolo wi na.

¹¹ Ki sereya wowi na fo: Yenñele li yinwege mbakogo ki kan we yeri, ki yinwege ki yen na taa li Pinambyo wo ni.

† **5:6 5.6:** Laga ki verise na wi ni, tònmo pi yen na para batemu na Zhezu wila pye wo senre na, a kasanwa pila para wi kunwo po senre na. Ko ki naga ma yo pa Zhezu wi tunngo kila le wa wi batemu pyege ki na ma saa ko wa wi kunwo pi na. Yinnekpoyi li yen naga sereya wi yuun ma yo Zhezu wi yen Yenñele li Pinambyo kologo shyen ni: Ki kongbannga Yinnekpoyi laa tigi Zhezu wi na wa wi batemu pyesaga (Zhan 1.32-34), ki shyen wogo li yen naga yuun naga finligi bere wa tagafenne pe nawa pitunmbolo pe sereya wi fannga na, ma yo Zhezu wi batemu wo naa wi kunwo pi ni pi yen naga nari ma yo wi yen Kirisi, Yenñele li Pinambyo (2.27; 1 Koren 12.3).

12 Na ka yenle Yenñele li Pinambyo wi na, yinwege ki yen wi ni. Na si yenle li Pinambyo wi na, yinwege ki woro wi ni fyew.

Yinwege mbakoo senre

13 Yoro mbele ye taga Yenñele li Pinambyo wi mege ki na, mi yen naga kagala ngele ke yonlogi mbe ke torogo ye kan, jango yege jen ye yo ye yinwege mbakoo ki ta.

14 Kotogo nga we ta Yenñele li yege na koyi nga, fo na waga yaraga ka yenri li yeri mbe yala li nandanwa kala li ni, li maa nuru we yeri.

15 Na we kaga jen mbe yo waga yaraga nga fuun yenri li yeri li maa nuru we yeri, pa we yaa ki jen mbe yo yaraga nga we yenri li yeri wege ta mako.

16 Kapege nga kila lere le wa kunwo† pi ni, na lere wa ka wi sefo wa yan wila ka piin, wi Yenñele li yenri ki fo wi kan, pa Yenñele li yaa yinwege ki kan wi yeri. Mbele pe kapere ti woro na pe nii wa kunwo pi ni, ki wogo nga ki mbe ya pye poro kan ce. Een fo, kapege ka yen wa, nga ki ma lere le wa kunwo pi ni, mi sho fo yaa yenri ko kapege cenle ko kala na.

17 Kambasinngge pyew ki yen kapege, een fo, kapere ta yen wa to na lere le wa kunwo pi ni.

18 Wege jen ma yo lere na fuun wi yen Yenñele li pyo wo wa na koro mbaa kapege piin, katugu Yenñele li Pinambyo wi maa wele wi na, Sotanla wila ya mbe yaraga ka pye wi na.

† 5:16 5.16: *Kunwo mba senre tila yuun po pi yen kunwo mbakoo we, ko koro wo yen mbe laga Yenñele li na fo sanga pyew.*

¹⁹ Wège jɛn ma yo we yɛn Yɛnɛɛ li woolo, fɔ dunrɛya woolo pe yɛn wa Sɔtanla wi fanɲga ki nɔgɔ.

²⁰ Wège jɛn fun ma yo Yɛnɛɛ li Pinambyɔ wì pan ma tijinliwɛ kan we yeri we ta we Yɛnɛɛ jɛnɛ li jɛn. We yɛn ma mara Yɛnɛɛ jɛnɛ li na li pinambyɔ Zhezu Kirisi wo fanɲga na. Wo jate wo wi yɛn Yɛnɛɛ jɛnɛ le, wo wi yɛn yinwege mbakɔgɔ ki go ye.

²¹ Na piile, ye ye yɛɛ yingiwɛ jɛn yarisunndo ti ni!

**Bibulu Jinmiire ni
Sénoufo, Djimini: Bibulu Jinmiire ni Bible**

copyright © 2014 Wycliffe Bible Translators, Inc.

Language: Djimini Senoufo

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 18 Apr 2025 from source
files dated 29 Jan 2022

a4863791-1c91-5f31-9a8f-034a18a2f8d8